

حقوقی بیکیسیر مجموعه سی

هر آی صوکنده نشر اولنور

۱۰ — ۵ مارت قانونی ۱۰ نجی ماده سنده «قضا صفتی حائز اولمایان اجرا معاونلری ایله اجرا مأمورلرینک عدلیه وکالتجه تعیین» اولوناجغنی بیان ایتدکدن سوکره ایکنجی فقره سنده علاقه دار مأمورلری یعنی بعض اوراق کوندرلسی ویا بعض کونا معاونت ایفاسی کی اجرا مأمورینک تبلیغاتی تنفیذه دعوت ایدیلن مأمورلری، تبلیغ ایدیلن خصوصاتی ایفایه مجبور ایتمک وعدم اطاعت حالده حقارنده مدعی عمومیلکجه رأساً تعقیبات جزائیسه اجرا ایدیله جکئی قید ایتشدرد. تعیر دیکرله وظیفه اصلیه دن اولمایان اجرا دائره سنک بر تبلیغی انفاذ ایتمه مک وظیفه مأموریتده اهامال عد اولونمشدرد.

مع مافیه ماده، نه قدر مطلق اولورسه اولسون، اجرا دائره سی طرفدن بر مأموره وظیفه مأموریتی ایجابی مکلف اولمادینی بر خدمت تحلیف ایدلش ویا آمر طرفندن خلافه امر ویریلش ویا خود تقدیری منحصرأ کندیسنه عائد بر مسئله موضوع بحث اولمش ایسه بوماده نك تطبیق قابل اولماسی لازم کلیر.

۱۱ — قانون مدینک مرعیت قانونی موجبجه (ماده: ۴۵) صلح محکمه لری اعلاملری، داین کفالت ارائه سنه حاجت اولماق سزین و کسب قطعیت ایتسنه انتظار ایتکسزین ده اجرا ایتدیره بیلیر. ۵ مارت قانونی ۱۱ نجی ماده سنده محکوم علیه کفالت و رسمی ویا اشیا سنک تحت حمزه آلمسی حالده بوفقره نك تطبیق ایدیله میه جکئی بیان ایتکده در. § مؤلف، اصول محاکمه یه دائر قریباً نشر ایده جکی بر کتابده بومقاله یی تماماً ویا قسماً عیناً نشر ایتمک حقنی محافظه ایده ر.

حقوق فاکولته سی مدرسلرندن

مصطفی رشید

مقود جزا

یکی جزا قانوننک هیئت عمومیه سی حقنده بعض مطالعات

مقدمه

یکی جزا قانونمژ هیئت عمومیه سی اعتباریله قانون مدنی طرزنده ایتالیان قانونندن عیناً اقتباس ایدلش دکلدر. کرچه قانوننک ترتیبی صره سنده آله موجود و ۱۹۰۹ و ۱۳۳۶ تاریخنده

استانبولده یابدیرلش مطبوع بر ترجمه دن [۱] اقتباس ایدلش بر چوق احکام موجود ایسه ده نونک خارچنده استانبول جزا قانونی قومیسو نجه وجوده کتیریلان بعض احکامدن و ۱۳۴۰ سنه سنده آنقرده جزا قانونک مستعجلاً تعدیلی اقتضا ایدن موادینک تعدیلی اینجون طوبیلانوب ۲۲ نیسان ۱۹۲۶ ده نشر اولنان ۵۲ بدلك قومیسوینک تنظیم ایلدیکی مواد قانونیه دن پک چوق احکام آئشدر .

اساساً ۱۸۸۹ تاریخی ایتالیان جزا قانونی ۴۹۵ ماده در . یکی جزا قانونمز ایسه ۵۸۹ ماده در .

۱

افعال ممنوعه نك قسمی

یکی قانونک وجوده کتیردیکی یکیدکلردن هیچ شهسز برنجیسی افعال ممنوعه نك قسمی در .

فرانسز جزا قانونه استاد ایدن ۱۲۷۵ تاریخی قانونمز افعال ممنوعه نی اوچه تقسیم ایتکده ایدی! جنایت، جنحه . قباح .

ایتالیان اصوله استاد ایدن احکام حاضره «قانونک جزالندیردینی فعللری جرء وقباح» دییه ایکیه تقسیم ایدیور .

ایکیکک واولچک طرفدارلرینک اوتهدن بری بربرلرینه قارشو تعریضاتی بروجه آتی تلخیص اوله بیلیر .

ایکیکک طرفدارلری دیرلرکه : «جنایت و جنحه نی یکدیکلردن ماهیتلری اعتبارله تفریق ایده جک فارق خاصه یوقدر . هیچ شهسز اک آغیر افعال ممنوعه نی جنایت تلقی ایدیورسکز . جنحه ایسه جنایتدن دها خفیف اولان افعال ممنوعه در . شو حالده افعال ممنوعه نك ماهیتدن زیاده یکدیکلردن نسبة خفیفک و آغیرلغنی نظر دفته آله رق جنایت و جنحه دییه تفریق پایورسکز . مثلاً قتل بعضاً جنایت و بعضاً جنحه اولیور . کذلک سرقت وصفه کوره قانونک زده جنایت و جنحه اولمقده در . شو حالده عندی تقسیم یابه جفکزه ایکیه تقسیم ایله اکتفا ایتک دها منطقی اولمازمی ؟

ثانیاً ؛ جنایت و جنحه لر ماهیتلری اعتبارله عینی وصفی حائز اولدقلری حالده

[۱] اشبو مطبوع ترجمه استانبولده کی عدلیه کتبخانه سنده موجود دکدر .

قباحتزدن هر ایکسینی آیره جق اوصاف میزه واردر. نه کیم جنایت و جنحه لر جرائم قصیده دن در. قباحترده ایسه قصد آرانماز. شو خالده اوچه تقسیم ده علمی بر ماهیت ده یوقدر. چونکه عینی نوعدن اولان شیرک تقسیعی موضوع بحث اوله بیلیر. حالبوکه قباحتر جنحه و جنایت دن آری و بشقه در.

حالبوکه جرم و قباحث دییه تقسیم علمی در.

قباحث ده فاعلک قصد جرمیسی اصلا موضوع بحث دکدر. واضع قانونک جزا. لندیردینی فاعلک تسبب و اهاالی در. قباحث مرتکبک هیچ بر سوء نیتی تصور اوله ماز. احتمالک ترکدن دولاییده هیچ بر ضرر حادث اولماشدر. فقط انتظام عمومینک تأمین ضمنتده واضع قانون یاپ دییه امر ایتش اولدینی شینی بایمامسی دولایسیله هیئت اجتماعیه ایچون بلکه بر ضرر تولد ایتسی محتمل بولنشد.

جرم ایسه عمومیتله فنا بر قصدک و کوتو بر املک حصول بولسی ایچون ایقاع اولنش و بونکله کرک فردی و کرک اجتماعی ضرر حصولی قویاً ملحوظ بولنشد.

ایشته افعال ممنوعه و صوچی ایکی به تقسیم طرفداری اولانلرک استناد ایتدکری مطالعات غارو Garraud بو اعتراضانه شو صورته جواب ویربور :

« افعال ممنوعه بی ایکی به تقسیم طرفداری اولانلرک بیاناتی و مطالعاتی اوچه تقسیم اساساتی دکشدر مک سائق اوله جق بر ماهیت عرض ایتمز، بونی آکلایه بیلیمک ایچون اوچه تقسیمک معنا و ساحه شمولی تدقیق ایتک اقتضا ایدر. واضع قانون طرفندن مختلف افعال ممنوعه ایچون تعیین اولزان جزالر افعالک هیئت اجتماعیه ایچون تولید ایتدیکی تهلکه ایله متناسب اوله رق آغیر و یا خفیف اوله رو تعیین ایدلشد. بناء علیه مثلاً بر فعل ممنوع ایچون واضع قانون قباحث دیمش ایسه اونک استلزام ایتدیکی جزا خفیف اولوب بوکا واضع قانون آنحق مجازات تکدیرده دن بر جزا تعیین ایتش و فضله بر جزا ویرمکی مناسب کورمه مشدر. فقط عینی فعلک ایراث ایتدیکی ضرر اعتباریله ساحه شمولی کنیش اولدینی تقدیرده بوکا جرم دیمشد. »

« ایشته جنایت، جنحه و قباحث » دییه افعال ممنوعه نك تقسیمی بو سبیدن ابلیر کلدشدر. قانونلری آچیکز بر فعل کاه جنایت، کاه جنحه و کاه قباحث اوله بیلیر.

« ایکی به تقسیم ؛ مادی مشکلات ده عرض ایدر. شویله که؛ هر مملکتده اولدینی وجهله بعض نوع افعال ممنوعه نك زوری به عرضی مقتضی در. بو تقدیرده ایکی به تقسیم اولندینی

حالده برنجی قسمی ایکنجی دفعه بر تقسیم ایتک ایجاب ایدر . حالبوکه ایستالیاده بیله جرملرک بر قسمک ژوری حضورنده جنایت محکمه سنده محاکمه سی اجرا اولنور .

« حالبوکه اوچه تقسیمک شمدی به قدر آ کلاشلمش برحق قانده لری موجوددر . شویله که اولاهر نوع افعال جرمیه به تقابل ایتک اوزره محکمه لر موجوددر . جنایت افعالی ژورینک موجود اولدینی جنایت محکمه لرنده قباحث دعوالری پولیس محکمه لرنده و بونک خارجنده قالان جنبه دعوالری ایسه بدایت جزا محکمه لرنده تدقیق اولنور .

ایشته ایکی نظریه نک طرفدار و علیهدارلرینک خلاصه مطالعاتی .

غارونک فرانسه ایچون بیان ایتدیکی مطالعاتی بزده عیناً قبول ایتکه امکان یوقدر . چونکه بزده اک خفیف افعال جرمیه نک محاکمه سیله مشغول اولان و هر نصلسه اسمنه یا کشفله صلح محکمه سی دینن [۱] محکمه لره فرانسه ده اولدینی وجهله یالکیز مجازات تکیدریه بی استلزام ایدن افعال جرمیه نک محاکمه سی براغلمش دکلدر . حقیقهً ابتدای تأسندن بری صلح محکمه لرینک علی العاده اوج سنیه قدر و اسکی قانونک مرعی اولدینی زمانلرده تکرر حالده آلتی سنیه قدر جزا و یرمک صلاحیتی موجوددی .

بو کون صلح محکمه لرینک وظائفی محاکم اصلیه نک وظائفندن همان همان فضلهدر .

۵ مایس تاریخی ۸۲۵ نومرولی قانونک ۲۹ نجی ماده سنه کوره صلح حاکم لری قباحث افعالیله بونک خارجنده بر حق جرائمی رؤیتده صلاحیتداردر . بناءً علیه بزده اقسام جرائمه تقابل و تطابق ایتک اوزره محکمه احداث ایدلش دکلدر . کیفیت صلح محکمه لری ایچون بویله اولدینی کبی محاکم اصلیه و آغیر جزا محکمه لرینک وظائفی تعیینده بعض نوع جزا لر فلان محاکمه و بعض نوع جزا لر فلان محاکمه تودیع ایدلش دکلدر . نته کیم بش سنهدن فضلہ حبس جزاسنی مستلزم جرملرک محاکمه سنک آغیر جزا دائره لرینه [۲]

[۱] صلح جزا محکمه لرنده یالکیز اول باول حقوق شخصی بی خللدار ایدن و فراغتله حقوق عامه دعوا سنک سقوطنی ایجاب ایدن افعال جرمیه نک محاکمه سی اجرا اولنیور . بلکه حقوق عامه بی علاقه دار ایدن برحق افعال جرمیه وارددر که مدعی شخصینک دعوا دن واز کیمه سی تعقیباته مانع تشکیل ایتمز و بونلرده حاکم صلح تکلیفنده ده بوانه ماز . بو سببدن بو محکمه لره صلح جزا حاکمی برینه قباحث حاکمی دیمک دها مناسب اولور .

[۲] اخیراً ۱ حزیران ۹۲۷ تاریخندن اعتباراً موقع مراعیته کیرمک اوزره محاکم اصلیه دائره لرینک علی العاده هیئت حاکمه سیله آغیر جزا ایشلرینی رؤیت ایده جکلیرنه دائر بر قانونک ملت مجلسنجه قبول ایدلدیکی غرتهلرده کورلمش ایسه ده هنوز بویله بر قانون رسمی جریده ایله انتشار ایتمه مشدر .

تودیع اولنه جنی مارالذ کر ۸۲۵ نومرولی قانونک ۲۷ نجی ماده سنده مذکوردر .
بناء علیه انواع مجازاته تقابل ایتک اوزره بزده محاکم موجود دکلدرد .

مع مافیه یکی جزا قانونمذک متقی تدقیق ایدیله جک اولورسه کوریلیر که اوچ تقسیم
اساسی جرح ایتکه کافی اسباب بولنمه ماز .

بر کره قباحث افعالی میاننده ساده جرائم اهایله طوبیلا نمدادینی کبی جرم لر میاننده
دقتسزلک ونظاماته رعایتسزلکله ایقاع ایدلمش افعالده کیرمشدر . بناء علیه ایکی به تقسیم ده
بیله بر قسمه داخل اولسی ایجاب ایدن افعال دیگر قسم میاننده قالمشدر .

واضع قانون بزده عیناً ایتالیان اصولنی قبول ایتمشدر . اسباب موجب لایحه سی قباحتری
« وطنداش لک دولته اولان حقوقی مناسبترینی اخلال ایدله جک ماهیته افعال تلقی
ایتمه مکده و بلکه بونلری [اجتماعی فعالیتلرک نظامنده ، یولنده جریاتی تأمین ایچون
موضوع بر طاقم تدابیره رعایتسزلک تلقی ایتکه مده در] . مع مافیه قباحث افعالی آره سنده ده
ساده جه تدبیرسزلک تلقی اولنمه یه جق بر چوق ممنوع افعالده موجوددر . جرم لره کلنجه
بو فعللرک فاعللرینی بر رشقی تلقی ایدن اسباب موجب لایحه سی ، بونلرک فاعللرینک
[حرکتلرله کندیلرینی مؤسس اجتماعی نظامات احوال و شرائطی خارجه چیقاردق لینه]
قائل اولمده در . لایحه ده افراط ایله تفریطه کیدلدیکی شبهه سزدر . چونکه حقارت ، عادی
فعل مؤثر کبی هیئت اجتماعی بی پک قطعی اوله رق علاقه دار ایتمز و معذور جرم لرک
عقولری حالده تعقیبات اجرا ایدیله مین بعض جرائم فاعللرینی شریر تلقی ایتک بو کونکی
دوشونجه لر مز ایله پکده قابل تألیف دکلدرد .

ایتالیان قانوننه امتثالاً افعال ممنوعه یی ایکی به تقسیم اساسی بعض دولتلر قانونلرنده
قبول ایتمشدردر . نته کیم فلمنک ، محارستان ، نورو هج قانونلرله اسویجره نک یکی تنظیم
ایدیلن اوچنجی قانون پروژه سنده ایکی به تقسیم اساسی قبول ایدلمشدر .

هولاندا قانوننده جرم وقباحث دیه ایکی به تقسیم محکمه لرینک تنوعی و تشکلی
اعتباریه قبول ایدلمشدر . فی الحقیقه فلمنک ایتالیا ده اولدینی وجهله آغیر جزا ایشلرنده
ژوری اساسی قبول ایدیلهمش وقباحث دعوالرینی رؤیته مکلف اولان محاکم جزا ایددن
بشقه بر نوع محاکم الک آغیر جزایی استلزام ایدن افعال جرمیه نک محاکمه سنی ده اجرا
ایتکه مده بولنمشدر .

بوکا مقابل ۱۹۲۳ روس یکی جزا قانونیله آلمان اوستریا پروژله لرنده وسائر اوروپا نك اسکی قانونلرنده موجود محاکمه تقابل ایتمک اوزره اوچه تقسیم اساسی محافظه و قبول اولمشدر .

۱۹۲۱ تاریخی یکی ایستالان جزا قانونی پروژهنك بو خصوصده وجوده کثیردیکی یکیلکی آروجه بر مقاله ایله موضوع بحث ایده جکزر .

حقوق فاکولته سی مدرسلرندن
آووقات

مهورت فریدر

مفوق مالی

ویرکیلرده دعاوی اداره

بزم ارباب اختصاصمز مختلف ویرکیلری تدقیق ایدرکن الکزیاده ویرکینک مطرحی، نسبتی، انعکاسی، استحصالاته درجه تأثیرینی و الحاصل عمومی برتعییر ایله ویرکیلرک اقتصادی و مالی جهتلرینی مطالعه ایله مکده درلر. حال بوکه ویرکی مسائلنده بوجهتلر قدر تدقیقه شایان دیگر بر مسئله واردرکه اوده ویرکیلره قارشی مکفلرک حق اعتراضلری و بوااعتراضلری تدقیق ایتمک اوزره تشکیل اولان هیئتلرک وظیفه و صلاحیتلری مسئله سیدر. بومسئله نك مالیه ایله اولدینی قدر بلکه اوندن فضلّه حقوق ایله علاقه سی واردر. ایشته اونک ایچوندرکه « حقوقی بیلکیلر » مجموعه سنده بوشنك تدقیقی مفید عد ایلدم .

ای بر اصول تکلیفک نه کی شرائطه موجود اوله جغنی تحری ایدن مشاهیر اقتصاد یوندن « آدام اسمیت » هر فردک ایفایه مجبور اولدینی ویرکینک مقداری قطعياً معلوم و معین اولمی، کیفی و خود سرانه اولما لیدر دیسه مهم بر قاعده وضع ایله مشدر . بوقاعده نك ایضاحی صره سنده دنیل مکده درکه ویرکینک معلوم و معین اولمی کافی دکدر . بلکه بر مکلف کندیسنه طرح ایدیلن ویرکینک مقدارینی فاحش کوردرسه ، یاخود تحقّق مأمورلرینک کندیسنه نسبت قانونیه دن فضلّه ویرکی طرح ایلدکلرینی ظن ایلرسه نرهبه اعتراض